

碧血錄

上

周



血
序
石
珀

血

錄

碧血序

鄭 鄮

逆璫毒流天下縉紳最烈楊左六君子之逮爲最先未
幾繆周七君子繼之讀燕客目擊所紀拷掠之慘振古
未聞起家詩書者乃至此極然諸君子上干天象下發
芝祥日星河嶽豈偶然哉三尺童子爭誦說無不思覩
其遺文是編則皆銀鐙後筆也楊中丞諸篇草於鎮撫
血肉淋漓之餘讀之可涕可舞至於刀砍東風聞道矣
魏給諫自譜於檻車道上敘生平爲詳中及同志矛盾

語存其真不欲刪從來小人之乘君子未有不超於君子之自隙者也後之君子是可以觀顧憲副既發西曹已濱九死作自敘多微詞其生平有不盡言亦猶古君子之道也繆宮諭自錄成於聞逮一俄頃妻子環泣叱勿亂我恐後無知我者遂不停筆得數千言嗚呼此何時也可不謂賢乎高中丞寥寥數言投淵以死不辱身不辱國就義從容蓋中丞之志也李侍御詩婉而刺誦至業因修省之句令人萬念灰冷古來忠節文章到頭入道厥有由哉同事君子十三人惟六人有述然讀此

可知其餘事同心同患同夫何優劣之有抑余因是而歎生死之難也孔曰殺身成仁孟曰舍生取義蓋不殺身仁不能成不舍生義不可取故必破生死之關而後能求仁義之是匹夫匹婦意有決於一往而不必善其後至達官長者則并一往之氣盡劇於富貴利祿中矣夫惟神閒力定視死生如旦暮而後言所欲言爲所欲爲乃至劒樹刀山而此中不動其所以撐拄天下者心也非氣也嗚呼此諸君子所以爲君子也偶見有鈔傳一二者漏網之媚遂狺狺焉或勸是編勿傳而吾友人

毅然傳之謂明聖御天恩隆贈恤忠魂如日逆案如山
自非彪虎兒孫何至以觸忌相格處不諱之朝畱不死
之論此而不傳誰當傳者嗚呼斯亦可尙也已楊中丞
云虛存忠直肝腸化作萇宏碧血遂取以爲額若夫大
節昌言載在國史生平著述各詳家乘者悉不具錄

碧血錄序

武進趙懷玉撰

烏虜甘陵分而名士危東林盛而亂臣忌自古宦寺之禍莫不借朋黨以殺人而濫賞刑淫毒痛海內東漢桓靈以還未有如明熹宗之世者也然十常侍雖惡承望風旨者不過牢修段熲輩一二儉人明則閣部重臣封疆大吏貢諛獻媚爲爪牙而稱義兒者接迹於闥門矣太學儲才之地俊顧標榜雖甚而諸生三萬餘人各持清議明則身列成均矯誣先聖有請歲祀逆閹如孔子

者矣范孟博慷慨陳詞王甫刑餘猶爲改容明則儼然
冠紳甘戕同類聞二祖列宗之呼而褒如充耳矣起立
第宅豫作壽冢小人僭肆之常當時猶有破之者明則
陳符瑞讓邊功請建生祠跽拜而恐後矣廉恥道盡愈
出愈奇使無數君子摻拄其閒則天柱地維從此傾折
人心澌滅尙可問乎此碧血錄之所由作也錄成於燕
客首紀死忠者二十一人姓名次載六君子獄中遺筆
次附天人合徵錄而以天變人變終之客可謂有心人
矣方諸君子被逮納橐餗傾貲財周旋患難者所在多

有然或感恩知己傾倒有日客獨未謀一面子身入都
溷跡輿僇傳其筆札以徼倖於萬死一生此豈有所爲
而爲之者耶惜乎身處末流雖曉天文兵法未得見用
且并其名沒不傳也閒嘗思之汪文言之獄始於天啓
五年十二月明年而諸賢相繼離難又明年而帝崩使
先一年德陵短祚諸賢或未必死死亦未必如是之酷
乃天厭明德假手童昏迨夫人亡而邦已殄瘁此數實
主之彼星紀告戕神人致憤亦何益哉是編向藏錢唐
盧學士家鮑君以文將錢以厲世問序於予予惟東林

之學倡於顧高六君子之獄繆李實居其二緹騎過常
州士民憤擊一賣蔗童手蔗刀嚮其肉啖狗名雖未彰
事與五人竝烈逆祠遍寰宇吾郡以知府曾仲含先生
力持得免是毘陵於天下不過一隅而與天人爭氣數
者實出九域上詩云維桑與梓必恭敬止懷玉鄉之後
死與有榮施數典不忘迄今猶爲神往也旣應鮑君屬
因併書之諗後之居是邦者

碧血錄目

黃煜彙次

碧血紀死忠也其同事而生者不具載

欽贈光祿寺卿恩封三代賜祭葬蔭諡給還原銀以旌
忠直原任工部屯田司郎中萬燝字闇夫號元白
江西南昌府新建縣人天啓四年甲子六月杖死
遺書
無

欽贈太子太保都察院右都御史恩封四代賜祭葬蔭
諡給贍銀原任都察院左副都御史楊漣字文孺

號大洪湖廣德安府應山縣人天啓五年乙丑三

月逮詔獄死

遺書三種

辨揭 絕筆 血書

欽贈太子少保都察院右副都御史恩封三代賜祭葬

蔭諡原任都察院右僉都御史左光斗字遺直號

浮邱直隸安慶府桐城縣人天啓五年乙丑三月

逮詔獄死

遺書缺

欽贈太僕寺卿恩封三代賜祭葬蔭諡原任河南道監

察御史袁化中字民協號熙宇山東濟南府武定

州人天啓五年乙丑三月逮詔獄死

遺書無

欽贈太常寺卿恩封三代賜祭葬特祠諡蔭

長子學伊并奉旨附

祠原任吏科都給事中魏大中字孔時號廓園浙

江嘉興府嘉善縣人天啓五年乙丑三月逮詔獄

死

遺書一種

自譜

欽贈大理寺卿恩封三代賜祭葬蔭原任太僕寺少卿

周朝瑞字思永號衡臺山東東昌府南城縣人天

啓五年乙丑三月逮詔獄死

遺書缺

欽贈太僕寺少卿恩封三代賜祭葬蔭原任陝西副使

顧大章字伯欽號塵客直隸蘇州府常熟縣人天

啓五年乙丑三月逮詔獄死

遺書四種

自敘

書刑曹事

雜記

絕筆

欽贈太子太保吏部尙書賜祭葬蔭諡原任吏部尙書

趙南星字夢白號儕鶴直隸真定府高邑縣人天

啓五年乙丑三月提問戍死

遺書缺

未請卹

原任巡撫順天都察院右僉都御史鄧漢宇字

、號吾邱江西建昌府新城縣人天啓五年乙丑

三月提問戍死

遺書缺

未請卹

原任吏部文選司郎中夏嘉遇字

號繩北直

隸松江府華亭縣人天啓五年乙丑三月提問擺

站死

遺書缺

欽贈太僕寺卿恩封三代賜祭葬蔭諡給贓銀五百兩

原任四川道監察御史夏之令字宣伯號邵五河

南汝寧府光山縣人天啓五年乙丑九月逮詔獄

死

遺書缺

欽贈

原任揚州府知府劉鐸字

號洞初江西吉安

府廬陵縣人天啓五年乙丑十一月逮詔獄斬死

遺書無

欽贈太僕寺卿恩封三代賜祭葬蔭奉旨議諡原任江